



NEWSLETTER

OLIMPIJSKOG KOMITETA BiH

No. 28, januar/februar 2025



Poštovani sportisti i sportski radnici,
Poštovani prijatelji,

Nova, 2025. godina je otpočela sa zapaženim rezultatima naših sportista na domaćim i međunarodnim takmičenjima, na koje smo veoma ponosni. Delegacija Olimpijskog komiteta Bosne i Hercegovine učestvovala je na XVII zimskom izdanju EYOF-a u Bakurijaniju, Košarkaška reprezentacija Bosne i Hercegovine se kvalifikovala za učešće na Evropsko prvenstvo 2025, dok nas je mlada nada bh. streljaštva Zakira Pušina, obradovala sa dvije evropske medalje, zlatom i srebrom, osvojenim na Evropskom prvenstvu u Talinu.

Olimpijski komitet BiH godinu je otpočeo sa pripremama i projektima koji za cilj imaju podršku olimpijcima, vrhunskim sportistima, savezima, sportskim radnicima, te razvoju i unaprjeđenju sportskog sistema Bosne i Hercegovine.

U narednom periodu nas očekuje Simpozijum pod nazivom “Vizija i put ka Olimpijskim igrama Los Angeles 2028“, događaj posvećen ključnim pitanjima vezanim za naš zajednički put u pripremama za naredno izdanje olimpijskih igara. Tokom Simpozijuma, predstavnici OK BiH, olimpijci, vrhunski sportisti, sportski savezi BiH, predstavnici institucija nadležnih za sport i predstavnici medija evaluiraju trenutno stanje i analizirati realne potrebe koje moramo zadovoljiti kako bismo postigli naše ciljeve, a to su veći broj učesnika i bolji rezultati na Igrama. Uvjereni smo da će naš rad i zalaganje rezultirati ozbiljnim i svrsishodnim promjenama na opštu dobrobit bh. sporta!

Istovremeno, u toku su završne pripreme za niz projekata od kojih izdvajamo Napredne kurseve menadžmenta u sportu (Advanced Sport Management Courses –skr. ASMC). Radi se o kompleksnom edukativnom programu koji je osmišljen od strane Međunarodnog olimpijskog komiteta, te predstavlja kvalitetnu teoretsko-praktičnu platformu za unapređenje rada sportskih organizacija.

Olimpijski komitet BiH nastavlja sigurnim koracima ostvarivati ciljeve u skladu sa misijom i vizijom Olimpijskog pokreta u Bosni i Hercegovini.

S poštovanjem,

Akademik prof. dr Izet Rađo
Predsjednik OK BiH

OBIJEŽENA 41. GODIŠNJICA ZIMSKIH OLIMPIJSKIH IGARA SARAJEVO 1984 SA POGLEDOM U OLIMPIJSKU BUDUĆNOST

Olimpijski komitet BiH je 6. februara u Olimpijskom muzeju u Sarajevu bio domaćin obilježavanja 41. godišnjice Zimskih olimpijskih igara Sarajevo 1984. Ovom prilikom promovisana je knjiga „40. godišnjica Olimpijskih igara u Sarajevu“, koja kroz fotografije prikazuje ključne momente proslave 40. godišnjice i osvrt na olimpijsko nasljeđe.

Događaj je uključivao panel diskusiju na temu „Olimpijska budućnost i obnova olimpijskih borilišta“. Učesnici panela su bili: akademik prof. dr. Izet Rađo (predsjednik Olimpijskog komiteta BiH), Kenan Magoda (ministar sporta i kulture Kantona Sarajevo i bivši generalni direktor ZOI '84), dr. Sanela Klarić (stručnjak za održivu arhitekturu i olimpijska borilišta) i Predrag Puharić (gradonačelnik Grada Sarajeva).



Panel je raspravljao o aktualnom stanju olimpijskih objekata, potencijalu za buduće olimpijske događaje, uključujući mogućnost organizacije Zimskih olimpijskih igara za mlade 2032. godine, te neophodnoj potrebi za političkom podrškom na svim nivoima vlasti. Posebna pažnja posvećena je obnovi bob staze, skakaonica i ledene dvorane, uključujući i finansijske aspekte i planove za održavanje.

Ovaj događaj naglašava sarajevsku posvećenost olimpijskim idealima i nastojanje da se olimpijsko nasljeđe očuva i unaprijedi za buduće generacije. Grad Sarajevo nastavlja težiti za održivim razvojem i promocijom olimpijskih vrijednosti.

Kompletnu vijest pročitajte na linku [OVDJE](#). Video panel diskusije je takođe dostupan na [OVOM LINKU](#).



RADNA POSJETA FEDERALNOM MINISTARSTVU KULTURE I SPORTA



Predstavnici Olimpijskog komiteta Bosne i Hercegovine, predsjednik akademik prof. dr. Izet Rađo i generalni sekretar doc. dr. Said Fazlagić, posjetili su ministricu Federalnog ministarstva kulture i sporta, Sanju Vlasisavljević. Ova posjeta predstavlja nastavak napora Olimpijskog komiteta BiH i Komisije olimpijaca BiH u cilju povećanja budžeta za vrhunske sportiste, kao i stvaranja optimalnih uvjeta za predstojeće olimpijske igre.

Glavne teme razgovora bile su obezbjeđivanje adekvatnih finansijskih sredstava za podršku sportistima koji se pripremaju za Zimske olimpijske igre Milano Cortina 2026, kao i Ljetne olimpijske igre Los Angeles 2028. Predstavnici OK BiH istakli su kako su trenutni budžeti nedovoljni za kvalitetan (i kvantitativan) odlazak na ove značajne sportske manifestacije, a posebno nedovoljni za ostvarivanje vrhunskih rezultata, što dodatno naglašava potrebe bh. sportista u predstojećem olimpijskom ciklusu.

Ministrica Vlasisavljević izrazila je razumijevanje za izazove s kojima se susreću vrhunski sportisti i obećala će se zalagati za unapređenje finansijskih sredstava i podrške sportskim programima.

Tom prilikom, Predsjednik Olimpijskog komiteta BiH uručio je ministrici knjigu “40. godišnjica Olimpijskih igara u Sarajevu”, koja je promovisana povodom obilježavanja 41. godišnjice održavanja ZOI Sarajevo 1984.

Posjeta i dijalog između OKBiH i Federalnog ministarstva kulture i sporta predstavljaju neke od ključnih koraka prema jačanju sistema podrške bh. sportistima, što će doprinijeti njihovom uspjehu na internacionalnoj i olimpijskoj sceni.

54. GENERALNA SKUPŠTINA EVROPSKIH OLIMPIJSKIH KOMITETA



Evropski olimpijski komiteti (EOK) održali su 54. sjednicu Generalne skupštine od 27. februarara do 01. marta u Frankfurtu. Tokom sjednice su izabrani organi i tijela EOK-a za mandatni period 2025 - 2028, a za Predsjednika EOK-a je reizabran gosp. Spyros Capralos.

Ispred OK BiH na Generalnoj skupštini su učestvovali predsjednik akademik prof. dr. Izet Rađo, potpredsjednik Davor Komšić i generalni sekretar OK BiH doc. dr. Said Fazlagić.

KNJIGA ZA JUANA ANTONIA SAMARANCHA JR. „40. GODIŠNJICA OLIMPIJSKIH IGARA U SARAJEVU“



Tokom Generalne skupštine EOK-a, predsjednik OK BiH, akademik prof. dr. Izet Rađo i generalni sekretar OK BiH, doc. dr. Said Fazlagić, imali su čast uručiti knjigu „40. godišnjica Olimpijskih igara u Sarajevu“ gospodinu Juanu Antoniu Samaranch-u JR., članu Međunarodnog olimpijskog komiteta (MOK) i sinu bivšeg predsjednika MOK-a Samaranch-a.

Ovom knjigom ovjekovječeni su uspjesi jedne bosanskohercegovačke generacije vrhunskih sportista, kao i njegovog oca, tadašnjeg predsjednika Međunarodnog olimpijskog komiteta. Tokom sastanka razgovarali su o olimpijskoj budućnosti Sarajeva i Bosne i Hercegovine, kao i o ambicijama za buduće projekte.

Upoznali su gospodina Samarancha s planovima za kandidaturu za Olimpijske igre mladih (YOG) 2032. godine, te o obnovi postojećih sportskih borilišta kako bismo stvorili još bolje uvjete za sportaše.

ISTANBUL UBRZAVA PRIPREME ZA EVROPSKE IGRE 2027



THE EUROPEAN GAMES

Organizacija Evropskih olimpijskih komiteta (EOC), Istanbul (IMM) i Turski nacionalni olimpijski komitet (NOC) zvanično su potpisali ugovor za Igre koje će se održati u Istanbulu 2027. godine. Evropske igre Istanbul 2027 su četvrte po redu, a poslužit će kao glavni kvalifikacijski događaj za Olimpijske igre u Los Angelesu 2028.

Ugovor je formalizovan tokom 54. Generalne skupštine EOC-a, čime je potvrđeno da će najveći grad u Turskoj biti domaćin najvažnijeg sportskog događaja u Evropi za dvije godine. Nakon odobrenja EOC-a na 53. Generalnoj skupštini u junu 2023. godine, potpisivanje ugovora otvara put za ubrzanje priprema u Istanbulu. Potpun sportski program za četvrtu ediciju Evropskih igara biće objavljen krajem ove godine.

Svečanosti potpisivanja u Frankfurtu, prisustvovali su predsjednik EOC-a Spyros Capralos, gradonačelnik Istanbula Ekrem İmamoğlu i predsjednik Turskog NOC-a prof. dr. Uğur Erdener. Uz snažnu podršku svih aktera, uključujući tursku Vladu, događaj ima za cilj postaviti nove standarde za Evropske igre.

Objavljene su i sportske discipline koje su do ovog perioda uključene u sportski program Igara:

Streljaštvo
Atletika
Badmington
Boks
Gimnastika
Mačevanje
Hrvanje
Dizanje tegova
Moderni petboj
Streličarstvo
Plivanje/Plivanje na otvorenim vodama
Taekwondo
Triatlon
Odbojka
Džudo
Karate
3x3 Košarka
Kajak i kanu na mirnim vodama
Stolni tenis.

PREDSJEDNIK OK BIH AKAD. PROF. DR IZET RAĐO PRISUSTVOVAO DODJELI DIPLOMATSKIH PASOŠA BH. NAUČNICIMA



Predsjednik OK BiH akad. prof. dr Izet Rađo, prisustvovao je dodjeli diplomatskih pasoša zaslužnim bh. i internacionalnim naučnicima koji svojim radom i naučnim dostignućima svjedoče da su sport i nauka usko vezani na svim poljima organizovanja i djelovanja.

Ova prestižna priznanja za značajan doprinos nauci u Bosni i Hercegovini dodijelio je Ministar vanjskih poslova BiH Elmedin Konaković, dok je Predsjednik OK BiH akademik Rađo uručio Ministru nedavno promovisanu knjigu povodom obilježavanja 40. godina od organizacije ZOI 84.



Dobitnik diplomatskog pasoša Bosne i Hercegovine je i predsjednik partnerske organizacije Olimpijskog komiteta Bosne i Hercegovine - Internacionalne akademije nauka i umjetnosti u BiH akademik Asim Kurjak kao jedan od 2% najcitiranijih naučnika u svijetu. Olimpijski komitet BiH i Internacionalna akademija nauka i umjetnosti BiH su partnerstvo ozvaničili potpisanim Memorandumom o saradnji.



Akademik Asim Kurjak, predsjednik IANU BIH, je profesor emeritus na Sarajevo School of Science and Technology i predsjednik Međunarodne akademije perinatalne medicine. Autor je 1.217 znanstvenih i stručnih radova, citiranih 16.322 puta, s h-indeksom od 70 (do 9.8.2023.).



Napisao je ili uredio 123 knjige na 12 jezika, što ga čini jednim od najproduktivnijih svjetskih znanstvenika. Dobitnik više od deset nagrada, uključujući državnu nagradu za mlade znanstvenike i nagrade HAZU za medicinsku znanost. Član je nekoliko akademija, uključujući Rusku akademiju znanosti i umjetnosti, te član Akademije znanosti i umjetnosti Bosne i Hercegovine.

ISMAIL BARLOV I PEDESET DVOJE ZASLUŽNIH I VRHUNSKIH SPORTISTA NAGRAĐENI NA SVEČANOSTI U SARAJEVU



Ministarstvo civilnih poslova BiH predvođeno ministricom Dubravkom Bošnjak, organizovalo je svečanu ceremoniju dodjele Državne nagrada za sport Bosne i Hercegovine za 2024. godinu. Nagrada je dodijeljena Ismailu Barlovu, čiji uspjesi, uključujući osvajanje srebrne medalje na Paraolimpijskim igrama u Parizu i zlatne medalje na Evropskom seniorskom prvenstvu u Portugalu, predstavljaju simbol snage ljudskog duha i nepokolebljive volje.

“Ovdje smo kako bismo odali priznanje sportistima koji su svojim trudom i zalaganjem zaslužili da ih prepoznamo i podržimo. Nagrade predstavljaju veliko priznanje i poštovanje za sve ono što su postigli. Među dobitnicima je i jedan izuzetan mladić – Ismail Barlov, srebrni paraolimpijac, čiji nas je rad, hrabrost i posvećenost inspirisala,” rekla je dodjeljujući nagradu ministrica civilnih poslova Dubravka Bošnjak.

Na ovogodišnjoj ceremoniji priznanja su dodijeljena i za pedeset dvoje vrhunskih i zaslužnih sportista iz različitih sportskih disciplina, među kojima su plivanje, atletika, tenis, rukomet, odbojka, džudo i drugi.

Ministrica Dubravka Bošnjak izrazila je ponos i zahvalnost sportistima koji svojim rezultatima promovišu BiH u svijetu. Pored Barlova i kategorisanih sportista, ceremoniji su prisustvovali i drugi zaslužni sportisti, predstavnik Olimpijskog komiteta BiH generalni sekretar doc. dr Said Fazlagić, predstavnici Paraolimpijskog komiteta Bosne i Hercegovine, sportski radnici i zvaničnici.

Državna nagrada za sport dodjeljuje se od 2009. godine i predstavlja najviše priznanje koje Bosna i Hercegovina dodjeljuje za razvoj i afirmaciju sporta. Među ranijim dobitnicima ovog priznanja nalaze se i velika imena bosanskohercegovačkog sporta poput Lane Pudar, Amela Tuke, Elvedine Muzaferije, Edina Džeke i legendarnog Ivica Osima. Dodjelom ovih priznanja, Ministarstvo civilnih poslova Bosne i Hercegovine nastavlja da podržava sportiste i prepoznaje njihov izuzetan doprinos društvu i međunarodnoj promociji BiH. Tekst: [MCP BiH](#)

POTPISAN MEMORANDUM O SARADNJI IZMEĐU OLIMPIJSKOG KOMITETA BOSNE I HERCEGOVINE I ENERGOINVESTA



Olimpijski komitet Bosne i Hercegovine i Energoinvest potpisali su Memorandum o razumijevanju, kojim se definišu aktivnosti usmjerene na jačanje sportskog sistema u BiH, s posebnim fokusom na podršku olimpijcima, vrhunskim sportistima i mladim talentima.

„Pred nama su Zimske olimpijske igre Milano–Cortina 2026, a ubrzo nakon toga i Ljetne olimpijske igre Los Angeles 2028. Ovim Memorandumom renomirana kompanija Energoinvest i Olimpijski

komitet BiH žele poslati snažnu poruku da zajedničkim djelovanjem uspješnih bh. kompanija, OK BiH i nadležnih sportskih institucija na svim nivoima možemo osigurati vrhunskim sportistima adekvatne uslove i stvoriti ambijent u kojem će kontinuirano ostvarivati izvanredne rezultate,“ izjavio je akademik Izet Rađo, predsjednik OK BiH. Direktor Energoinvesta, Mirza Ustamujić, istakao je da je ova kompanija ponosni simbol bosanskohercegovačke privrede s više od 70 godina tradicije.



„Kompanija Energoinvest je imala značajnu ulogu u organizaciji i infrastrukturnom dijelu Zimskih olimpijskih igara 1984. godine u Sarajevu, od tada je naša veza neraskidiva. S druge strane, Energoinvest je prepoznatljiv bh. brend za koji volim reći da je mnogo više od same kompanije, izuzetno je posvećen društvenoj odgovornosti, razvoju mladih talenata u oblasti sporta i kulture, te stvaranju boljih uslova za njihov napredak. Energoinvest je sinonim za povjerenje, kvalitet i stabilnost, ne samo u energetskej i infrastrukturnoj oblasti,

već i u podršci ovakvim inicijativama, što nas diverzificira od svih kompanija u ovom segmentu i čini apsolutnim liderom pozitivnih promjena, što se na kraju od nas i očekuje“, naglasio je Ustamujić. Ovo partnerstvo još je jedan korak ka unapređenju sporta u BiH, a saradnja s privrednim sektorom pokazuje koliko je važno zajednički ulagati u buduće sportske uspjehe.

ČELNICI OK BIH POSJETILI OLIMPIJSKI MUZEJ



Predsjednik Olimpijskog komiteta Bosne i Hercegovine, akademik prof. dr Izet Rađo i potpredsjednik Davor Komšić posjetili su Olimpijski muzej u Sarajevu, te razgovarali o projektu kandidature Sarajeva i Istočnog Sarajeva za YOG 2032 (Olimpijske igre za mlade).

Olimpijski muzej ne čuva samo naslijeđe Zimskih olimpijskih igara Sarajevo 1984, već i prvog zajedničkog sportskog događaja Sarajeva i Istočnog Sarajeva – zimskog EYOF-a održanog 2019. godine.

Podržimo našu olimpijsku budućnost!

PREDSJEDNIK KOMISIJE ZA MEĐUNARODNE ODNOSI U POSJETI OK BIH

Predsjednik OK BiH akademik prof. dr Izet Rađo, generalni sekretar OK BiH doc. dr Said Fazlagić i viši stručni saradnik doc. dr Dejana Planinčić primili su u radnu posjetu predsjednika Komisije za međunarodne odnose IK OK BiH, Đorđa Jugovića.



Tokom sastanka razgovarano je o radu Komisije za međunarodne odnose, kao i pripremi kandidature Sarajeva i Istočnog Sarajeva za zimske Olimpijske igre mladih 2032. godine. Ovaj ambiciozni projekat predstavlja značajan korak ka povratku olimpijskog plamena, promociji olimpijskih vrijednosti, međunarodne suradnje i razvoja infrastrukture, a njegovo ostvarenje bi moglo donijeti mnoge benefite za Bosnu i Hercegovinu i regiju.

BRANISLAV STOJKIĆ U RADNOJ POSJETI OK BIH



Predsjednik OK BiH prof. dr Izet Rađo primio u radnu posjetu g-dina Branislava Stojkića, člana Skupštine OK BiH i člana Suda časti i sportske arbitraže OK BiH.

Tokom sastanka razgovaralo se o trenutnoj situaciji u bh. sportu sa posebnim osvrtom na rukometni sport. Predsjednik Rađo je sa g-dinom Stojkićem razmjenio tekuće informacije o aktivnostima i procesima u Olimpijskom komitetu BiH.

KAMPANJA GLAS SPORTISTA



Olimpijski komitet BiH je početkom 2025. godine ponovo promovisao Kampanju Glas sportista usmjerenu ka sistemskom rješavanju finansiranja vrhunskog sporta u Bosni i Hercegovini. Online Kampanja je kreirana zajedno sa olimpijcima i vrhunskim sportistima, putem koje je 12 najboljih bh. sportista kroz video poruke poslalo jasne poruke javnosti i donosiocima odluka o realnim potrebama bh. sportista – najboljih ambasadora Bosne i Hercegovine. Kampanja je urađena u saradnji sa agencijom Fabrika

NAJAVA | VIZIJA I PUT KA OLIMPIJSKIM IGRAMA LOS ANGELES 2028



Olimpijski komitet Bosne i Hercegovine nastavlja permanentan rad na problematici finansiranja vrhunskog sporta u BiH. U narednom periodu, OK BiH će organizovati Simpozijum posvećen ključnim pitanjima vezanim za naš zajednički put ka Olimpijskim igrama Los Angeles 2028. godine.

Olimpijski komitet Bosne i Hercegovine, olimpijci, vrhunski sportisti, sportski savezi Bosne i Hercegovine, predstavnici institucija nadležnih za sport i predstavnici medija evaluiraće trenutno stanje i analiziraće realne potrebe koje moramo zadovoljiti kako bismo postigli naše ciljeve, a to su veći broj učesnika i bolji rezultati na Igrama.



SPORTSKI SAVEZI BOSNE I HERCEGOVINE

OZVANIČEN POČETAK RADA BIATLON SAVEZA BOSNE I HERCEGOVINE



U prisustvu brojnih uglednih zvanica, bivših biatlonaca, trenera i sportskih radnika, u Olimpijskom muzeju u Sarajevu, 19. februara ozvaničen je početak rada Biatlon saveza Bosne i Hercegovine. Osnivanje Saveza predstavlja značajan korak u promovisanju biatlona i daljeg razvoja talentovanih sportista iz cijele zemlje. Bosna i Hercegovina se sada nalazi među 62 zemlje Međunarodne biatlon unije (IBU) koje imaju svoje nezavisne federacije.

Obraćajući se prisutnima, predsjednik novoformiranog Biatlon saveza BiH, Ljubiša Tanić naglasio je da osnivanje Saveza predstavlja veliki korak za Bosnu i Hercegovinu i jak temelj za uspjeh na međunarodnim takmičenjima, te da će to podrazumijevati bolji protok informacija i kontrolu finansijskih sredstava. Istakao je da ono što Bosnu i Hercegovinu izdvaja od većine zemalja u regionu, jeste izuzetno dobra infrastruktura, gdje trenutno prednjači borilište Dvorišta na Jahorini, te Veliko polje na Igmanu.

Generalni sekretar OK BiH doc. dr Said Fazlagić je čestitao i poželio puno sreće u radu Biatlon savezu BiH, istaknuvši da se na narednoj sjednici očekuje aplikacija kako bi Savez zvanično postao 42. članica Olimpijskog komiteta Bosne i Hercegovine.

Cijelu vijest pročitajte na linku [OVDJE](#).



SANKAŠKI SAVEZ BIH | FILM "THE TRACK"



Film *The Track* istražuje priču mladih bosanskih sportista, Mirze Nikolajeva, Zlatana Jakića i Hamze Pleha, te njihovog trenera Senada Omanovića, koji treniraju na devasiranoj stazi za sanke i bob izgrađenoj za Zimske olimpijske igre 1984. u Sarajevu. Pored fizičkih izazova sporta, suočavaju se s nedostatkom finansiranja i zastarjelom infrastrukturom.

Ovaj dokumentarac, prikazan na True/False Film Festivalu, osvaja srca publike dok ukazuje na postratne poteškoće Bosne i Hercegovine.

“Mi u Sankaškom savezu BiH svakodnevno radimo s vjerom i odlučnošću, vođeni snovima o boljoj budućnosti naše olimpijske staze na Trebeviću. Naša ljubav prema sportu, tradiciji i zajedništvu daje nam snagu da ne odustanemo. Za nas, Trebević nije samo staza; on je simbol istrajnosti, nade i zajedničkog sna. U svakom kutku ovog betonskog kanala utkane su priče generacija koje su sanjale velike snove. Sanjamo o danu kada će se naša staza ponovo ispuniti zvukom pobjeda, smijeha i novih sportskih priča. A vjerujemo da ćemo uz podršku Olimpijskog komiteta Bosne i Hercegovine napraviti velike stvari. Naša vizija i naša borba nisu samo za nas – to je za sve nas koji vjerujemo u moć snova, zajedništva i neuništive nade. Svaki korak koji pravimo vodi nas bliže tom cilju, a sigurni smo da ćemo zajedničkim snagama uspjeti”, saopštili su iz Sankaškog saveza BiH.

SANKAŠKI SAVEZ BIH | KNJIGA "REDEFINIRANI HEROJI"



Doug Levy autor knjige “Redefinirani heroji” u knjizi istražuje manje poznate priče olimpijskih sportista i nekoliko jedinstvenih olimpijskih objekata koji propituju konvencionalni narativ o slavi i zlatu. U uzbudljivim ličnim profilima koji istražuju herkulovske podvige snage, izdržljivosti i sportskog duha, nagrađivani sportski novinar Doug Levy nudi novu viziju heroizma. Jedan od prikazanih heroja u knjizi novinara Levy je Senad Omanović, selektor Sankaškog saveza BiH, nekada vrhunski sportista i olimpijski trener.

“Heroj koji ne odustaje od olimpijske Bob i sanakaške staze na Trebeviću. Senad ne odustaje ni od mladih ljudi budućih sportista, olimpijaca heroja našeg sporta. On jednostavno čistog srca okuplja sve nas koji vjerujemo da olimpijski identitet grada Sarajeva mora da živi, a da svi olimpijski objekti mogu i trebaju da donose radost života, sportske radosti, ali i ekonomsku i svu drugu dobit gradu i zemlji”, izjavili su iz Sankaškog saveza BiH. Knjiga “Redefinirani heroji” autora Doug Levy je još jedan dokaz koliko je veliki broj svjedočanstava i okupljenih ljudi koji stoje uz Senada i ostale olimpijske heroje tražeći da se naš identitet olimpijskog grada vrati u život svih nas.

BOSNA I HERCEGOVINA JE DOMAĆIN VELIKOG MEĐUNARODNOG VATERPOLO TURNIRA U TREBINJU



Vaterpolo reprezentacija Bosne i Hercegovine do 16 godina je počela intenzivne pripreme za Evropsko prvenstvo koje će se ove godine održati u Ljubljani u julu mjesecu ove godine. U sklopu priprema Vaterpolo savez Bosne i Hercegovine će biti domaćin velikog međunarodnog vaterpolo turnira. Natjecanje će se održati u Trebinju u periodu 14.04 - 18.04., a na njemu će učestvovati neke od najboljih

evropskih reprezentacija. Učesnici turnira su: Hrvatska, Srbija, Crna Gora, Mađarska, Njemačka, Turska i reprezentacija Bosne i Hercegovine. Veliko priznanje je i činjenica da je European Aquatics uvrstio ovaj turnir u svoj zvanični kalendar takmičenja, čime je postao jedan od najvažnijih takmičenja u ovoj uzrasnoj kategoriji.

Vaterpolo reprezentacija Bosne i Hercegovine će pokušati iskoristiti ovo takmičenje za podizanje forme pred Evropsko prvenstvo, a mladi vaterpolisti se nadaju da će u Sloveniji ostvariti jedan od najboljih rezultata u istoriji BiH vaterpola.

POVRATAK PLIVANJA U ZENICU: KLUB VODENIH SPORTOVA WINNER

Plivački sport se ponovo vratio u Zenicu. Priču KVS Winner o ovoj inicijativi vam prenosimo u nastavku: "Zenica je nekada bila poznata po plivačkim talentima, ali gašenje bazena dovelo je do gotovo potpunog nestanka plivanja u gradu. Mnogi mladi nisu imali priliku učiti plivati ili se takmičiti, a plivački klubovi ostali su samo uspomena. Međutim, grupa profesora sporta i entuzijasta je odlučila vratiti plivanje u Zenicu. Na Dan grada, 20. marta 2023. godine, osnovan je Klub vodenih sportova Winner Zenica.



Počeci su bili teški zbog nedostatka bazena, pa su treninzi održavani u okolnim centrima. I pored izazova, entuzijizam i zajedništvo članova kluba oživjeli su plivanje. Djeca iz Zenice ponovo su počela učestvovati na takmičenjima, ponosno predstavljajući svoj grad. Danas Klub Winner okuplja mnogo mladih koji treniraju van grada, čekajući izgradnju bazena. Klub nije samo obnovio sport, već postao simbol nade i snage zajednice. Djeca sada imaju priliku sanjati velike snove, a njihovi roditelji i treneri ponosni su na priču o povratku plivanja u Zenicu. Ime Winner poručuje da pobjednici nisu samo oni koji osvajaju medalje, već i oni koji vjeruju i nikada ne odustaju."

ALPE ADRIA MOTORCYCLE UNION GENERALNA SKUPŠTINA 2025

U Hotelu "Adriale" u Kreševu održana je Generalna skupština i sastanci Komisija Alpe Adria motociklističke unije. Na sastancima su usvojeni Kalendari i Pravilnici za 2025. godinu. Generalno je istaknuto veliko zadovoljstvo svih sudionika prilikom analize vrlo uspješne protekle sezone, te izražena želja da ova motociklistička unija zadrži primat najorganiziranije i najaktivnije u FIM Europe.

Domaćin Skupštine je bio Motociklistički savez BiH, a na istoj je sudjelovalo 20 delegata iz 13 evropskih zemalja.



SVEČANOM AKADEMIJOM U KAKNJU OBILJEŽEN JUBILEJ TKD NUR



Svečanom akademijom u Domu kulture u Kaknju, Taekwondo klub Nur obilježio je 20 godina postojanja. Događaju su prisustvovali predstavnici lokalne zajednice, prijateljskih klubova, te federalnog i državnog taekwondo saveza.

Osnivač i predsjednik kluba, Halim Fejzić, poželio je dobrodošlicu gostima i zahvalio članovima kluba. Prikazan je dokumentarni film o radu kluba u protekle dvije decenije, a Fejzić je istaknuo da je klub od osnivanja

u vrhu bosanskohercegovačkog taekwonda. Načelnik Općine Kakanj, Mirnes Bajtarević, poručio je da će podrška klubu biti kontinuirana, naglašavajući važnost usmjeravanja djece na pravi put. TKD Nur se može pohvaliti s više od 400 osvojenih pehara i medalja na domaćim i međunarodnim takmičenjima. Na svečanoj akademiji dodijeljene su zahvalnice svima koji su doprinijeli radu kluba, uključujući najbolje članove. Predsjednik Taekwondo saveza FBiH, Samir Šarić, pohvalio je rad kluba i istakao važnost etičkih vrijednosti koje reprezentuje Halim Fejzić.

BICIKLISTIČKI TRENER IZ BIH PO PRVI PUT U SVJETSKOM BICIKLISTIČKOM CENTRU NA PRESTIŽNOJ EDUKACIJI



Mladi biciklistički trener iz Travnika, Marko Martinović, po prvi put je pozvan u Svjetski biciklistički centar (World Cycling Centre - WCC) u Aigleu, Švicarska, na prestižnu edukaciju za UCI licencirane trenere. Ovo je ujedno i prvi put da Međunarodna biciklistička federacija (UCI) poziva sportskog radnika iz Bosne i Hercegovine na ovako visoku razinu usavršavanja zahvaljujući naporima Biciklističkog saveza BiH i Olimpijskog komiteta BiH, te saradnji sa Međunarodnom biciklističkom federacijom (UCI) i Međunarodnim olimpijskim komitetom (MOK).

“Marko je pozvan zahvaljujući svom dosadašnjem radu i uspješno završenom UCI Level 2 programu, a ovo je ujedno i prilika za buduću suradnju s profesionalnim timovima i međunarodnim biciklističkim strukturama”, rečeno je iz Saveza.

Marko će od 1. do 23. travnja 2025. godine boraviti u UCI kampu, gdje će usko surađivati s nekima od najboljih trenera u svijetu biciklizma te nakon toga polagati za prestižnu UCI Level 3 diplomu.

“Pored sportista, fokus djelovanja Olimpijskog komiteta Bosne i Hercegovine je i usavršavanje trenera. Sretni smo što smo mogli obezbjediti podršku i vjerujemo da će Marko svojim znanjem pomoći razvoju i budućim uspjesima biciklističkog sporta BiH. Radujemo se nastavku saradnje i na drugim projektima sa Biciklističkim savezom Bosne i Hercegovine, a sve na dobrobit sportista i sportskog sistema BiH”, izjavio je predsjednik Olimpijskog komiteta BiH, akademik prof. dr. Izet Rađo. Predsjednik Biciklističkog saveza BiH, gđin. Toni Zorić istaknuo je važnost ovog projekta i naglasio kako kompletna procedura slanja Marka ide preko Olimpijskog komiteta Bosne i Hercegovine (OK BiH), koji će snositi kompletne putne troškove, troškove smještaja i edukacije, financirane kroz Solidarity programe.

“Poziv Marka Martinovića u Svjetski biciklistički centar (WCC) u Aigleu predstavlja veliki korak naprijed za biciklizam u Bosni i Hercegovini. Ovo je prvi put da Međunarodna biciklistička federacija (UCI) prepoznaje rad sportskog djelatnika iz naše zemlje na ovako visokoj razini, što je rezultat dugogodišnjeg predanog rada, suradnje i zajedničkih napora Biciklističkog saveza BiH i Olimpijskog komiteta BiH. Marko je svojim dosadašnjim angažmanom zaslužio ovu priliku i uvjeren sam da će znanja i iskustva stečena tijekom edukacije u WCC-u doprinijeti daljnjem razvoju trenerskih kapaciteta i unaprijediti biciklistički sport u našoj zemlji,” naglasio je Zorić.

Biciklistički savez Bosne i Hercegovine i OK BiH žele treneru Martinoviću puno uspjeha u Švicarskoj i raduju se njegovom povratku s novim znanjima i iskustvima koja će nesumnjivo doprinijeti razvoju biciklizma u našoj zemlji.



CHEERLEADING SAVEZ BIH



Na međunarodnom turniru Zagreb Open Bosnu i Hercegovinu predstavljali su Hrvatski cheerleading klub Široki, Cheerleading klub Ledinac i Sportski cheerleading klub Ljubuški. Lana Draškić članica Hrvatskog cheerleading kluba Široki osvojila je zlatnu medalju u juniori individual, drugo mjesto pripalo je predstavnici Crvene Zvezde iz Beograda, a treće mjesto predstavnici Zagreba. Ovo je Lanin prvi nastup u ovoj disciplini, a postignuti rezultat će joj svakako biti veliki vjetar u leđa u budućnosti. Hrvatski cheerleading klub Široki natjecao se i ekipno gdje je osvojio 4 mjesto, ista situacija kao i sa Lanom ovo je nova

generacija i ovo im je bilo prvo natjecanje u ovoj disciplini. Sportski cheerleading klub Ljubuški je u disciplini predjuniori group stunt osvojio brončanu medalju. Cheerleading klubu Ledinac ovo je prvo natjecanje izvan granica Bosne i Hercegovine u disciplini group stunt uzrast kadeti osvojili su 4 mjesto.

Zagreb Cheerleading Open sudili su suci iz Slovenije, Mađarske, Amerike i Hrvatske, a natjecanje se uživo moglo gledati preko interneta.

SAVEZ KLIZAČKIH SPORTOVA BIH | TARIK OMERAGIĆ

Najbolji bosanskohercegovački brzoklizač, Tarik Omeragić, uz podršku Saveza klizačkih sportova BiH i Olimpijskog komiteta Bosne i Hercegovine, putuje u Peking, gdje će od 14. do 16.03. nastupiti na Svjetskom seniorskom prvenstvu u brzom klizanju. Tarik je u ovoj godini uspješno nastupio na Evropskom prvenstvu i na svjetskim kupovima u Tilburgu i Milanu, a u Pekingu će imati priliku da ostvari još bolji rezultat i potvrdi svoj kvalitet pred odlučujuće nastupe u oktobru ove godine u kvalifikacijama za odlazak na ZOI 2026 u Milano-Cortina.



SAVEZ DIZAČA TEGOVA BIH



Reprezentacija BiH u Olimpijskom dizanju tegova se aktivno priprema za učešće na Evropskom prvenstvu koje će se održati u Moldaviji, od 13. do 22. aprila. Plasman na EP je ostvarilo pet takmičara (Faris Durak, Zerina Kobilić, Dino Smajić, Mak Numić i Azra Alatović), a selektovani su i dvoje sudija (Nedim i Enisa Mašić). Selekciju takmičara je obavio selektor Ivica Soldo, a nastupit će pod trenerskom palicom Harisa Duraka.

Takođe i veteranska reprezentacija se priprema za Prvenstvo Evrope u Albaniji u maju mjesecu, gdje će nastupiti trojica veterana: Nedim Mašić (aktuelni svjetski i prvak Mediterana), Vlatko Buzuk (Svjetski prvak 2010. godine i aktuelni prvak Mediterana) i Ivica Soldo, prvi BiH državljanin, koji je izbacio 200 kg. Iz SDT BiH saopštavaju

da očekuju 3 zlatne medalje i svjetske rekorde na Prvenstvu za veterane, te obaranje seniorskih BiH rekorda na Evropskom prvenstvu.

BIH TEAM

XVII ZIMSKI EYOF BAKURIANI 2025



Bosanskohercegovački tim učestvovao je na XVII zimskom Evropskom omladinskom olimpijskom festivalu u Gruziji koji je održan od 9. do 16. februara 2025. godine u Bakurianiju. Ovaj sportski događaj okupio je oko 1000 mladih sportista iz cijele Evrope.

Našu zemlju su predstavljali Srđan Lalović, biatlon i nordijsko skijanje i Liv Ella Candler, umjetničko klizanje. Treneri u pratnji tima su bili Bojan Minić (biatlon i nordijsko skijanje) i Zara Husedžinović (umjetničko klizanje), dok je šef misije bh. tima bila doc. dr Dejana Planinčić.

Najbolji rezultat je ostvario Srđan Lalović u biatlon disciplini 12.5 km individualno, ostvarivši plasman na 26. mjesto od ukupno 64 takmičara. Lalović je bio i nosilac zastave na ceremonijama otvaranja i zatvaranja Festivala.



ZAKIRA PUŠINA EVROPSKA PRVAKINJA!



Mlada bh. streljačica, petnaestogodišnja Zakira Pušina osvojila je zlatnu i srebrnu medalju na Evropskom prvenstvu za kadete održanom u Tallin-u.

Zakira Pušina je 11.02. osvojila titulu viceprvakinje Evrope, u narednom nastupu je osvojila i medalju zlatnog sjaja. Nakon dva kvalifikaciona kruga, Zakira je ostvarila 37 bodova i u finale ušla s hrvatskom takmičarkom Marinom Kožar, koja je imala bod više. U završnici finala, gdje se pobjednik nije znao do posljednjeg hica, Zakira je još jednom dokazala svoju sposobnost da izdrži pod

najvećim pritiscima. Posljednjim pogotkom osvojila je prvo mjesto s ukupno 12 bodova, dok je Marina Kožar završila s 11 bodova. Sa dvije osvojene evropske medalje, Zakira se, iako još mlada i na početku svoje sportske karijere, svrstala među najbolje strijelce u istoriji Bosne i Hercegovine.

Čestitamo Zakiri na izvanrednim rezultatima, trenerima, klubu i Streljačkom savezu BiH.

KOŠARKAŠI BOSNE I HERCEGOVINE IDU NA EUROBASKET 2025!



Košarkaška reprezentacija Bosne i Hercegovine ubjedljivo je pobijedila Kipar u 5. kolu kvalifikacija za Eurobasket, slavivši rezultatom 108:62 pred prepunim Mejdanom!

Nakon pobjede reprezentacije Bosne i Hercegovine i pobjede Francuska u utakmici protiv Hrvatske u Zadru, bh. reprezentacija se zvanično kvalifikovala na Eurobasket.

Čestitke igračima, selektoru i Košarkaškom savezu Bosne i Hercegovine!

TONI MILETIĆ OSVOJIO ZLATO NA EVROPA OPENU U LJUBLJANI

U izuzetno jakoj konkurenciji na Evropa Open-u u Ljubljani, džudo reprezentativac Bosne i Hercegovine Toni Miletić osvojio je zlatnu medalju.

Naputu do trijumfa u kategoriji do 90 kilograma Miletić je upisao pet pobjeda. Redom je pobjeđivao Daniela Pintera (Češka), Marata Kryzhanskog (Ukrajina) i Segeva Bena Hardocha (Izrael), dok je u polufinalu savladao još jednog predstavnika Ukrajine, Stanislava Gunchenka.



Da se na početku ove godine nalazi u odličnoj formi, Miletić je potvrdio pobjedom na Špancem Danielom Nietom Trinidadom, koji trenutno zauzima 58. mjesto na svjetskoj rang-listi.

“Uvijek je lijepo osvojiti zlatnu medalju, pogotovo na takmičenju poput Evropa Open-a u Ljubljani, na kojem je ovog puta konkurencija bila izuzetno jaka. Raduje me da sam već na početku godine uspio napraviti ovakav rezultat. Siguran sam da će mi biti podstrek i motiv da u narednom periodu radim još bolje i kvalitetnije”, kazao je Miletić nakon pobjede u Ljubljani.

ADA AVDAGIĆ BRONZANA NA PRESTIŽNOM TURKIJE OPEN-U



Taekwondo reprezentativka Bosne i Hercegovine Ada Avdagić osvojila je bronzanu medalju na prestižnom G2 turniru Turkiye Open-u u Antaliji.

Trećim mjestom na ovom konkurentnom takmičenju u kategoriji do 53 kilograma, Avdagić je pokazala da se na startu nove kalendarske godine nalazi u odličnoj formi, te nastavlja rezultatski kontinuitet. Podsjećamo da je Ada Avdagić protekle godine na Evropskom prvenstvu za seniore u Beogradu osvojila bronzanu medalju, a potom i bronzu na Evropskom U21 seniorskom prvenstvu u Sarajevu.

ISTORIJSKI USPJEH FK BORCA I BH. FUDBALA



Fudbaleri Borca plasirali su se u osminu finala Konferencijske lige, te u fantastičnoj utakmici pokazali veliku borbenost i želju za pobjedom uz taktički vrlo dobro postavljenu igru sa dosta šansi pred golom Olimpije.

Ovo je prvi put da se jedan klub iz Bosne i Hercegovine, od njene samostalnosti, plasirao u knock-out fazu nekog evropskog klupskog takmičenja.

Čestitke igračima, treneru Mladenu Žižoviću i Nogometnom/Fudbalskom savezu Bosne i Hercegovine!

RUKOMETNI KLUB IZVIĐAČ NASTAVLJA EVROPSKI SAN

U spektakularnoj atmosferi pred punom Gradskom športskom dvoranom u Ljubuškom, rukometaši Izviđača ostvarili su impresivnu pobjedu protiv kiparskog Anorthosis-a rezultatom 30:25 i time se plasirali u četvrtfinale EHF Evropskog kupa!

Prvi meč je završio remijem 25:25, a skauti nastavljaju svoj evropski san.

Ovaj uspjeh predstavlja jedan od najvećih trenutaka u istoriji bosanskohercegovačkog rukometa.

Čestitke igračima, treneru i svima koji su učestvovali u još jednom uspjehu bosanskohercegovačkih sportista i klubova!



ANUR MEHIĆ NASTAVLJA SA SJAJNIM REZULTATIMA



Dva sjajna rezultata za našeg talentovanog skijaša Anura Mehića, člana Skijaškog kluba Naš Tim i dječije reprezentacije Bosne i Hercegovine.

Srebrnu medalju osvojio je u slalomu održanom 7. februarar na prestižnom Alpecimbra Children FIS Cup-u, nekadašnjem Trofeo Topolino.

Ovo je prva medalja za muško skijanje u istoriji ovog takmičenja za BiH. Važno je napomenuti da se Alpecimbra Children FIS Cup smatra kao nezvanično svjetsko prvenstvo za kadete u alpskom skijanju i održava se već 64 godine u italijanskoj Folgariji.



Da ovaj rezultat nije slučajnost Anur je potvrdio osvojivši zlatnu medalju u slalomu na takmičenju održanom prije tri dana. Prvo mjesto zauzeo je na takmičenju Pokal Loka, koje se 50 godina održava u Škofiji Loki u Sloveniji, gdje je Anur iza sebe ostavio drugoplasiranog takmičara za čak 1,69 sekundi.

Ovom izuzetnom mladom skijašu želimo svu sreću, a on se već priprema za nove izazove na međunarodnoj skijaškoj sceni, jer će zajedno sa ostalim članovima dječije reprezentacije Bosne i Hercegovine učestvovati na međunarodnom takmičenju Zagreb CHI FIS.

Olimpijski komitet Bosne i Hercegovine upućuje čestitke Anuru, njegovom treneru, klubu i Skijaškom savezu Bosne i Hercegovine.

OSAM MEDALJA ZA BH. KARATISTE

Evropsko prvenstvo u karateu za kadete, juniore i U21 održano je u Bielsko-Biala, Poljska, od 07. do 09. 02. 2025. godine.

Na ovom prestižnom takmičenju okupilo se oko 1200 mladih karatista iz 49 država, a Bosna i Hercegovina osvojila je ukupno osam medalja.

Srebrne medalje osvojili su Kenan Šiljak u kategoriji U21 -60 kg i Daris Džafo u kategoriji kadeta -57 kg. Bronzane medalje pripale su Emini Sipović (U21 -61 kg), Aliju Arnautoviću (juniori -68 kg), Heni Mehaniji (juniorke -59 kg), Nejri Zukić (juniorke -48 kg), Zoloti Ismail (U21 -75 kg) i Ismailu Đidiću (juniori -55 kg).



Bosnu i Hercegovinu predstavljalo je 38 takmičara u katama i borbama.

Takmičare su vodili selektori: Mirsada Suljkanović Selimović, Armin Topalović, Adnan Arnautović, Boris Jeličić, Goran Ivković, Ante Katić i Edhem Halilović. Vođa delegacije bio je Admir Zukan, generalni sekretar Karate saveza BiH. Čestitke!

NICOLLE BEGOVIĆ PREDSTAVLJAĆE BOSNU I HERCEGOVINU



Supruga bivšeg reprezentativca Bosne i Hercegovine u fudbalu, Asmira Begovića, Nicolle Begović, uspjela je da se registruje kao takmičarka u dresuri konja pod zastavom Bosne i Hercegovine.

Nakon predstavljanja Velike Britanije planira svoj međunarodni povratak na takmičenja u 2025. godini s konjem Jeroen Leatherdale G (Jerry) za BiH.


Nicolle i "Jerry" su par od 2020. Nicolle je pokazivala Jerryja na naprednom nivou u Ujedinjenom Kraljevstvu i sada je spremna za CDI debi pod zastavom BiH.

U 2025. godini Nicolle će se pridružiti našim mladim i talentovanim jahačima, Luni Jusufović, Ajši Kazazović, Džanu Imamoviću, Nađi Imamović, koji zadnje tri godine brane boje Bosne i Hercegovine na takmičenjima u zemlji i inostranstvu, u dresurnom i preponskom jahanju.

Nicolle želimo sreću u novom pothvatu i da Bosnu i Hercegovinu predstavlja u najboljem svjetlu!

EU PROJEKTI

DESET GODINA VIZIJE, RADA I USPJEHA



Prije deset godina, Olimpijski komitet Bosne i Hercegovine krenuo je na put koji je bio sve osim lak – put izgradnje, učenja i dokazivanja. Od 2014. do 2024. godine, kroz projekte Europske unije, posvetio se jačanju sportskog sistema Bosne i Hercegovine, pružanju podrške vrhunskom i rekreativnom sportu, te unapređenju mogućnosti za sportiste, školarce, studente, djecu i mlade. Bilo je to deset godina predanosti, učenja, timskog rada, truda i odricanja.

Danas, ne samo da s ponosom gleda unazad na postignute rezultate – danas je kredibilan i lojalan partner, institucija koju u Briselu i šire prepoznaju i cijene. Europska unija, IOC, ANOC, EOC...vide Olimpijski komitet Bosne i Hercegovine kao stručnu i pouzdanu organizaciju, kao posebnu vrijednu pažnje i podrške. Ali još važnije, iza sebe ostavlja trag – trag u edukaciji, nauci, sportu i finansijama, trag koji će trajati dugo nakon ove decenije uspjeha.

Ova knjiga predstavlja svjedočanstvo deset godina predanog i kvalitetnog rada u okviru EU projekata, kroz koje je Olimpijski komitet Bosne i Hercegovine ostavio neizbrisiv trag u razvoju sporta, edukacije i međunarodne saradnje. Kroz dokumentovane rezultate, iskustva i postignuća, ona potvrđuje posvećenost jačanju sportskog sistema i dugoročnom uticaju ovih inicijativa.

Zahvalnost pripada svima koji su bili dio ovog putovanja – onima koji su vjerovali, radili i gradili. Onima koji su sport u Bosni i Hercegovini učinili jačim, vidljivijim i trajnijim. Jer sport je više od igre. Sport je vizija, zajedništvo i snaga koja mijenja generacije. Ova priča od 10 godina, tek počinje...

Publikacija je dostupna na linku [OVDJE](#).

WOMEN4SPORT: ŽENE U SPORTU ODLUČNE U POSTIZANJU SVOJIH CILJEVA! OK BIH OKUPIO BUDUĆE LIDERKE U SPORTU



Olimpijski komitet Bosne i Hercegovine bio je domaćin konferencije u okviru Erasmus+ projekta Women4Sport, koji se fokusira na postizanje rodne ravnopravnosti u vodstvu i donošenju odluka unutar nacionalnih olimpijskih komiteta zemalja Zapadnog Balkana, Women4Sport, posvećene jačanju ženskog liderstva u sportu. Ovaj značajan događaj okupio je istaknute stručnjake, akademike i sportistkinje s ciljem unapređenja položaja žena u sportskim organizacijama.

Konferenciju je otvorio predsjednik Olimpijskog komiteta Bosne i Hercegovine, akademik, prof. dr. Izet Rađo, a uvodne riječi uputio je akademik Asim Kurjak, predsjednik Internacionalne akademije nauka i umjetnosti u BiH koji je naglasio da je samo 25% žena u svijetu na liderskim pozicijama.

U okviru interaktivnog predavanja, akademik prof. dr. Izet Rađo, predsjednik Olimpijskog komiteta BiH, govorio je o evoluciji liderstva kroz vrijeme uključujući publiku da sa nama podijele svoja iskustva, dok je Nazif Hasanbegović, stručnjak za stratešku komunikaciju, predstavio izazove upravljanja ljudskim resursima u kontekstu ženskog liderstva.





Panel diskusije obuhvatile su ključne teme, uključujući ulogu digitalnih tehnologija u razvoju ženskog liderstva, gdje su govorili akademik prof. dr. Velimir Srića, direktorica Verlab instituta dr. sci. Lejla Gurbeta Pokvić, Azra Ademović, direktorica International Business Solution-a i inspirativna Selma Purić, ing. arh, bh. paraplivačica, web dizajnerica, trenerica paraplivanja u edukaciji.

Drugi panel fokusirao se na izazove ženskog liderstva u 21. stoljeću, uz učešće provjerenih sportskih liderki poput MTB biciklistkinje Lejle Njemčević, Nevena Šavore, direktorice Ureda za programe nacionalnih sportskih saveza i razvojne programe Hrvatskog olimpijskog odbora, predsjednice Specijalne olimpijade u BiH, prof. dr. Kade Delić Selimović, menadžerice Međunarodne ski i snowboard federacije Jelene Dojčinović, olimpijke Sanje Kusmuk, tehničke sekretarke Skijaškog saveza Bosne i Hercegovine, koji su sa nama podijelili izazove sa kojima su se susretali kroz svoju karijeru.

Na kraju Konferencije predstavljen je nacrt Strategije za jačanje pozicije žena u procesu donošenja odluka u sportu, s posebnim akcentom na regionalnu saradnju među zemljama Zapadnog Balkana.

Čast nam je što smo ugostili učesnike iz cijelog regiona Zapadnog Balkana i šire, uključujući istaknute stručnjake, kreatore politika i predstavnike sportskih saveza BiH – članica OK BiH, 41 sportskog saveza, istaknute sportiste i organizacije civilnog društva. Inicijativa Women4Sport je dvogodišnji Erasmus+ sport projekat izgradnje kapaciteta u oblasti sporta koji ima za cilj unaprijediti rodnu ravnopravnost u liderstvu i donošenju odluka unutar nacionalnih olimpijskih komiteta i sportskih saveza zemalja Zapadnog Balkana.

Ovaj događaj predstavlja važan korak ka osnaživanju žena u sportu i unapređenju rodne ravnopravnosti u sportskim organizacijama.

EU PROJEKT SAFE HARBOUR: SNAŽAN POČETAK JAČANJA ZAŠTITE U EUROPSKOM SPORTU

U Briselu se 28. i 29. januara okupio konzorcij EU projekta SAFE HARBOUR na uvodnom radnom sastanku. Ovo je ujedno bio i službeni početak ove inicijative. Tokom dva dana, predstavnici Nacionalnih olimpijskih komiteta, međunarodnih saveza i stručnih institucija udružili su snage, kako bi postavili temelje za jačanje mehanizama zaštite sportista. Prvog dana teme su bile usmjerene na historiji zaštite sportista, evropske i globalne strategije zaštite, učestalost zabrinutosti u vezi s zaštitom, te relevantne propise. Eminentni stručnjaci poput Kari Fasting, Annamarie Phelps, Maje Smrdu, Kirsty Charlotte Burrows, Karolien Adriaens i dr. Daniele Heerdt podijelili su svoja saznanja, pružajući sveobuhvatan pregled zaštite sportista u Evropi. Sudionici su također imali priliku učestvovati u sesiji pitanja i odgovora s predstavnikom Evropske komisije, dobivajući vrijedne preporuke za učinkovitu provedbu projekta.

Drugi dan nastavljen je sa interaktivnim sesijama, gdje su predstavnici nacionalnih olimpijskih komiteta i međunarodnih saveza podijelili najbolje prakse i izazove povezane s zaštitom u svojim zemljama. također su radili u grupama na prikupljanju podataka za mapiranje ključnih sudionika uključenih u postupanje s zabrinutostima u vezi s protekcijom sportista, a nakon toga su kroz predavanja stručnjaka, otvorene mnoge diskusije, koje postavljaju sjajnu osnovu za projekt SAFE HARBOUR.

Projekt SAFE HARBOUR okuplja 27 organizacija, uključujući Evropski olimpijski komitet (EOC EU office) koji je ujedno i koordinator ove sjajne inicijative, Međunarodni olimpijski komitet (IOC), dva međunarodna sportska saveza, 20 evropskih nacionalnih olimpijskih komiteta (NOC-ova) te istraživače i stručnjake za zaštitu sportista (Thomas More) i ljudska prava i pravo u sportu (Institut Asser).

Posebno smo sretni što smo dio velike Olimpijske sportske porodice za rješavanje ovako važnog pitanja kroz projekat "SAFE HARBOUR" koji će u narednim godinama raditi na stvaranju sigurnog i podržavajućeg okruženja za sportiste.

Posjetite našu web stranicu ([LINK](#)) i pretplatite se na SAFE HARBOUR Newsletter!



USPJEŠNA IMPLEMENTACIJA EU PROJEKTA OLYMPICKIDS!

Održan je završni sastanak EU projekta Olympic Kids, inicijative kreirane za širenje olimpijskih vrijednosti među mladima kroz sport i obrazovanje u Rimu, Italija.

Predstavnici zemalja učesnica (Turska, Španija, Grčka, Moldavija, Slovenija i Bosna i Hercegovina) podijelili su svoja iskustva o provedenim aktivnostima, seminarima i atletskim treninzima. Cilj projektnog konzorcijuma bio je približiti olimpizam i olimpijske vrijednosti djeci i mladima koristeći atletiku kao glavni alat.

Koordinator projekta istakao je važnost timskog rada i zahvalio svim partnerima na konstruktivnoj saradnji.

Iako projekat zvanično završava krajem februara, rad na promociji olimpijskih vrijednosti će se nastaviti! Uskoro ćemo razgovarati o novim inicijativama i mogućnostima za dalji razvoj.

Zaključno sa ovim projektom Olimpijski komitet Bosne i Hercegovine je implemetirao dvanaest projekata Evropske unije. OK BiH od 2014. godine, kroz projekte Evropske unije, posvetio se jačanju sportskog sistema Bosne i Hercegovine, pružanju podrške vrhunskom i rekreativnom sportu, te unapređenju mogućnosti za sportiste, školarce, studente, djecu i mlade.

Zajedno gradimo budućnost sporta!



SARAJEVO 1984: INSPIRACIJA ZA BUDUĆE OLIMPIJCE – OLYMPIC KIDS

Nakon završetka projekta Olympic Kids, aktivnosti na promociji olimpijskih vrijednosti se nastavljaju.

U okviru ostvarivanja jednog od ciljeva projekta, objavljen je kratki video o historijatu Zimskih olimpijskih igara Sarajevo 1984, u kojem su govorili bivši direktor Olimpijskog muzeja u Sarajevu, Edin Numankadić, generalni sekretar organizacionog odbora ZOI '84, Ahmed Karabegović i koordinatorica projekta dr. Maja Đurić.

Video možete pogledati na [OVOM LINKU](#).



INTERVJU ZAKIRA PUŠINA

OK BiH: Zakira, još jednom ti upućujemo čestitke na osvojenoj zlatnoj i srebrnoj medalji na Evropskom prvenstvu u Talinu. Kakav je osjećaj sada, nakon što su se slegli utisci?

ZAKIRA PUŠINA: Zahvaljujem Vam se na čestitkama, zaista mi je bila čast nastupiti kao mlad reprezentativac naše zemlje i osvojiti srebrnu i zlatnu medalju. Utisci su i dalje veoma snažni i prisutni su u svakodnevnoj komunikaciji sa ljudima iz okruženja, ali i sa onima koji me već i na ulici prepoznaju. Sve do povratka u našu zemlju nisam ni shvatala koliko su moje medalje značile svima, mom klubu, trenerima, porodici, prijateljima i meni.

OK BiH: Kako si se odlučila da treniraš streljaštvo? I sa koliko godina si prvi put probala ovaj sport?

ZAKIRA PUŠINA: Streljaštvom sam se počela baviti sasvim slučajno, u mojoj osnovnoj školi su podijeljeni letci Škole streljaštva i ja sam se prijavila i ne znajući šta da očekujem. To je bio oktobar 2021. godine i tada sam imala 12 godina. Prvi susret sa puškom nije prošao kako sam očekivala, naime, na prvom treningu nisam uopšte niti okrnula metu ni nakon ispaljenih 10-ak metaka, ali se u meni javio osjećaj da želim da nastavim i na kraju se evo pokazalo da se redovnim treniranjem postižu veliki uspjesi.

OK BiH: Koji su primarni planovi za 2025. godinu?

ZAKIRA PUŠINA: Primarni planovi za 2025. godinu jesu da se zabavim, da uživam u svakoj prilici koju imam da provedem na treningu, da nastavim da treniram kao i do sada. Mnogo je takmičenja koja nam slijede i nadam se da ću i na njima ostvariti zapažen uspjeh.





OK BiH: *Ostvarila si istorijski uspjeh bh. streljaštva. Koji je naredni takmičarski cilj?*

ZAKIRA PUŠINA: Moj naredni takmičarski cilj jeste da svojim radom i trudom opravdam titulu evropske prvakinje i spremim se za predstojeća takmičenja u ovoj godini.

OK BiH: *Da li imaš uzora u svijetu sporta i koja je tvoja poruka mladim u Bosni i Hercegovini?*

ZAKIRA PUŠINA: U svijetu sporta su mi uzori svi svjetski strijelci koji naporno rade, usavršavaju tehniku, grade prepoznatljiv stil gađanja, ostvaruju jake rezultate i to na najvećim takmičenjima. Navest ću za primjer samo neka imena poput Ban Hyojin iz Južne Koreje, Huang Yuting iz Kine, Aneta Stankiewicz iz Poljske...

Moja poruka mladim u Bosni i Hercegovini jeste da rade ono što ih ispunjava, i da ne prestaju da se usavršavaju i da napreduju čak i kada im drugi govore kako taj određeni sport možda i nije za njih, zaista samo rad i trud donose rezultate koji sa sobom nose brojne divne uspomene, prijateljstva i nagrade.



OK BiH: *Zakira, hvala ti na izdvojenom vremenu. Želimo ti mnogo uspjeha na predstojećim takmičenjima i da ostvariš svoje i naše sportske snove!*



ZAVIRITE U DRUŠTVENE MREŽE OK BIH (klikom na sliku)

Veselim se budućnosti i nadamo se uspješnim koracima prema novim olimpijskim izazovima!

#OlimpijskiKomitet #Sarajevo
#BosnaHercegovina #Olimpijskelgre
#YOG2032



Pratite nas na društvenim mrežama:
(klikom na ikone)



©2025. Olimpijski komitet Bosne i Hercegovine.
Sva prava zadržana.
www.okbih.ba

Specijalnu zahvalnost dugujemo sponzorima i partnerima OK BiH.
Klikom na logo posjetite njihove oficijelne stranice.



Moja priča.

